

LA USC DI LADINS – VENERDÌ 29 MARZO 2013

Artejegn, fajeve inant!

L Comun general de Fascia per l'Aisciuda ladina 2013 vel enjignèr e dèr fora ai sentadins na "Rubrica" de artejegn e boteghieres fascegn, per ge fèr reclam e envièr la comunanza a tegnir adum te chest moment de malsegureza economica

En ocasion de l'Aisciuda ladina 2013, l Comun general de Fascia, co la colaborazion de la Sociazion Artejegn e picola firmes de Fascia e del 'Servizio impresa srl', l vel dèr fora na publicazion per ladin sorida da vardèr fora con ite duta la firmes e la boteighes de Fascia spartides per categoria e coi contac che pel servir, percheche la jent posse se emprevaler de chisc servijes. Chest tant co l'obietif de ge dèr luster a chesta realtèdes economiches sul teritorie col valorisèr la profescionalitèdes de Fascia, acioche i sentadins posse se emprevaler de artejegn e boteighes del post, soraldut te chest moment grief de crisa economica, ma ence per tegnir adum e per ge dèr luster a nosc

teritorie. La publicazion tolarà ite ence n curt glossar terminologich per ladin di èrc duré da artejegn e boteghieres.

L libret vegnarà dat fora ti dis de l'Aisciuda ladina e dò enjontà al boletin del Comun general de Fascia che l ge vegn manà a duta la families de Fascia.

La Sociazion artejegn e l 'Servizio impresa' i ge manarà ite al Comun general i dac de si sozi. I artejegn e i boteghieres che no é enscinué te chesta sociazions, ma i é enteressé a esser touc ite te la scomenzadiva per aer reclam debant su la publicazion, i pel se oujer a l'Ofize per i servijes linguistics e culturèi del Comun general de Fascia manan na mail a la direzion cultura@

comungeneraldefascia.tn.it o chiaman l numer de telefon 0462/762158 dant che vae fora i 3 de oril del 2013 da les cinch da sera.



L Bertol, simbol de l'Aisciuda Ladina.